

## Vic Hendry vegn undraus

(anr/hh) **La vischnaunca ed il Forum cultural da Tujetsch honoreschan lur convischin Vic Hendry. Il scribent che ha astgau festivalar igl onn vargau igl anniversari da 85 onns ha publicau pliras interessantes ovras en romontsch, mo era tudestg.** La festività da honoraziun ha liug venderdis proxim, ils 20 da schaner 2006 allas 20.00 en sala da scola a Sedrun. Iniziantes ed organisaturs da quella sera ein la vischnaunca da Tujetsch ed il Forum cultural Tujetsch. Tenor la vischnaunca ed il forum vegn *Vic Hendry* undraus per sia vasta ovra e sia nunstunclenteivla lavur a favur dil lungatg romontsch. El s'audi senz'auter tier in dils pli enconuscents scribents che mereti il duiu respect davart la vischnaunca e la populaziun. La fiasta duei esser ina reconuschientscha ed in engraziament per la gronda prestaziun. Cun occasiun dalla sera vegn igl autur Vic Hendry a presentar sia pli nova ovra che porta il tetel «Miu plaid scol suer digl izun».

### Pliras distincziuns

Vischnaunca e forum procuran per in vast ed attractiv program dalla sera. Quel vegn embellius dalla Societad da musica Sedrun e dil Chor d'affons: Il punct culminont da quel ei la honoraziun entras il president communal *Pancrazi Berther*. Medemamein vegn Vic Hendry a preleger ed era a surdar sia biblioteca privata sco era dabia vischala custeivla d'antruras alla vischnaunca: Vic Hendry ch'ei naschius a Cavorgia e secasaus cun sia famiglia igl onn 1960 a Schaffusa ha scret in tschuppel ovras che han cattau admiraziun e reconuschientscha. Per sia lavur eis el vegnius undraus pliras ga. Aschia ha el retschiert persuerter pliras impurtontas distincziuns: Premi dalla fundaziun svizra da Schiller (1962 e 1992), premi dalla Cuminonza da Radio e Televisiun Romontscha (1980), il premi da reconuschientscha dil cantun Grischun (1984) ed il premi da cultura dil cantun Grischun (2001).

### In tschuppel publicaziuns

Liunga ei la gliesta da sias ovras da litteratura, lirica e prosa en romontsch e tudestg, mo era dallas publicaziuns en gasettas ed ella enciclopedia. Da menziunar ei per exempel il cudisch «Ils Franzos vegnan», in studi historic dil temps ch'ils Sursilvans ein vegni surpri dils Franzos ed han stuii sedustar e pitir giudlunder. Lu era la biografia «Furdibal - ella Merica cuntut». Quella descriva la tragica d'in um da biebein 30 onns ch'ins ha catschau ell'America cun siu fegl dad 11 onns, ferton che sia dunna ei restada en Tujetsch cun ina poppa d'in pèr jamnas e duas ulteriuras feglias per part malsaunas. Dalla Val Tujetsch ei Vic Hendry dil reminent sefatschentaus en pliras ovras, sco per exempel «L'untgida da Mariahelf» ni «La val dils tschuts». Bein enconuscentas ein era las ovras «Discuors cugl assassin», «Ils Saracens vegnan» ni era ils cudischs da poesias «Paun cucu» ed «Auras/Windzüge».